

Kaji semula Jom Heboh

■ AZIE YAHAYA

SHAH ALAM - Kerajaan Selangor akan mengkaji semula syarat-syarat yang dikenakan oleh penganjur program Jom Heboh sebelum melaksanakannya di negeri ini, kata Pengerusi Jawatankuasa Tetap Hal Ehwal Islam, Adat-Adat Melayu, Infrastruktur dan Kemudahan Awam negeri Selangor, Datuk Dr Hassan Mohamad Ali.

“Kita akan melihat semula syarat-syarat yang dikenakan pihak penganjur kepada kerajaan negeri sebelum ini. Malah, kita akan membuat beberapa pindaan serta menambah syarat-syarat kepada pihak penganjur jika program ini akan diteruskan di negeri ini.

“Perkara ini akan dibincangkan dengan Menteri Besar serta mendapatkan pandangan Exco yang lain sama ada wajar diteruskan ataupun tidak,” katanya ketika dihubungi, semalam.

Beliau berkata demikian ketika diminta mengulas kenyataan Mufti Perlis, Dr Mohd Asri Zainul Abidin yang meletak-



MOHD TAMYÈS

kan beberapa garis panduan mengenai program Jom Heboh di negeri itu termasuklah menentang kehadiran naib juara One In A Million (OIAM), Faizal Tahir.

Menurut Dr Hassan, kerajaan negeri akan memikirkan kepentingan program tersebut untuk rakyat negeri ini serta kesan daripada program tersebut.

“Dalam pada itu, kita kena kaji setakat mana kebaikan program serta aktiviti yang dianjurkan itu dapat membantu pembentukan sahsiah orang ramai terutamanya golongan muda.



DATUK DR HASSAN

“Kajian menyeluruh perlu dilaksanakan sebelum memberi kata putus mengenai perkara tersebut dan kita juga akan memanggil Mufti Selangor, ahli-ahli agama serta penasihat agama untuk membincangkan perkara ini,” katanya.

Ditanya mengenai kenyataan yang dibuat oleh Mufti Perlis yang melarang penyanyi Faizal Tahir untuk membuat persembahan di dalam program tersebut, Dr Hassan memberitahu teguran yang dibuat oleh Dr Asri bertujuan untuk menjaga keharmonian serta kepenting-

an agama dan rakyat.

“Pada pandangan saya, arahan tidak membenarkan penyanyi tersebut beraksi di dalam program tersebut bukannya satu tindakan menyeluruh. Maknanya, jika dilihat dari satu sudut, program ini dapat memberikan kesan negatif terutamanya para pelajar yang akan menghadapi peperiksaan,” katanya.

Sementara itu Mufti Selangor, Datuk Seri Mohd Tamyès Abdul Wahab berkata, golongan artis perlu memanfaatkan status mereka sebagai golongan yang dikenali dengan berperanan membawa masyarakat khususnya peminat mereka ke arah kebaikan.

“Artis yang sering kali mendapat tempat di hati para peminat tidak wajar mengambil kesempatan untuk melakukan apa sahaja,” katanya.

Tambah Mohd Tamyès, sebagai golongan yang sentiasa diberi perhatian, artis sepatutnya mengambil peluang untuk menunjukkan sifat dan tingkah laku baik yang boleh dicontohi.